



UKA 2019/165,166,135  
24.09.19.  
Peter Olsen

**Uunga siunnersuut: Eqqusuinermi akitsuutit pillugit Inatsisartut inatsisaata allangortinneqarneranik Inatsisartut inatsisaat nr. xx, xx. xxx 2019-imeersoq (Plug-in hybridbiilit akitsuutaat, biilnut innaallagissamik imaluunniit brintimik ingerlatilinnut akitsuummik akiliisussaanginneq kiisalu qamutit motorillit nunaannakkoortit minnerusut akitsuutaannik atorunnaarsitsineq)**

**Uunga siunnersuut: Qamutit motorillit akileraarutaat pillugit Inatsisartut inatsisaata allangortinneqarneranik Inatsisartut inatsisaat nr. xx, xx. xxx 2019-imeersoq (Qamutitut motorilinnut taamaallaat innaallagissamik brintimilluunniit ingerlatilinnut plugin hybridbiilinullu akitsuut, qamutitut motorilinnut nunakkoortitut mikinerit akitsuuteqartitsinnginneq kiisalu akiliinissamut piffissaliussamik allanngineq)**

**Qamutit motorillit akileraarutaat pillugit Inatsisartut inatsisaata allangortinnissaa, imaalillugu ATV-it taakkunungalu assingusut qamutit motorillit nunakkoortit mikinerit sisamanik amerlanerilluunniit assakaasullit ukiumut akileraarutaat 2.000 kronemut appartinnissaanik Naalakkersuisut peqquneqarnissaannik Inatsisartut aalajangiiffisassaattut siunnersuut.**

**(Inatsisartunut Ilaasortaq Stine Egede, Inuit Ataqatigiit)**

Siullermik; qulaani pineqartunut, qulequttanut soqutigintartunut inuiaqatigiinnullu tamatsinnut pingaaruteqarlunnaqqissaartunut siunnersuuteqarsimasunut siunnersuutigisimasaannut, qujanarujussuaq; Tassaasut Naleqqamiit inatsisartunut ilaasortat, qulequttanut siullernut marlunnut siunnersuuteqartuusimasut, minnerunngitsumillu Inuit Ataqatigiinniit Stine Egede siunnersuummut qulequttat pingajuanniittumik siunnersuuteqarsimasut qujanarujussuaq.

Aappassaattut; Qulequttat – siunnersuutit pingasut assigiinngitsut qulaani pineqartut ataatsikkoortillugit ataatsimut oqaaseqarfigineqartussanngortillugit, suliarineqartussanngortinneqarsimanerat naammaginangilluinnartut isigigatsigu Inuit Ataqatigiinniit oqaatigeqqaarusupparput. Qulequttat taakku pingasut saqqummiunneqarsimasut, tamarmik immikkut, inatsimmi, immikkoortuaraaluppasuarnik immikkoortortaqarput, tamarmik immikkut isummorsorfigineqarlutillu tamarmik immikkut aaliangiiffineqartariaqaraluartut; Immikkoortualuit ilaat isumaqatiginarsinnaallutik, ilaallu isumaqatiginarpallaartorsuunatik.

Taamaattumik tukattumik, paasiuminaassinnaasumullu allaat immaqa aqussinnaanngisartsinnik ajoraluartumik allamut sangusoortoqarsinnaavoq; taamaalilluni oqallinneq aqukkuminaallunilu paasiuminaatsorujussuannorsinnaalluni. Immikkut tamarmik qaqinneqarsinnaasuugaluarpata, tamanna tamatsinnut oqinnerullunilu pitsaanerungaatsiarsimassagalarpoq.

Aap ajunngilaq, tassa kisianni tamaappoq allangortissinnaasimannngilarput, naammagalugu tigullugu naatsumik ima oqaaseqaateqassaagut:

Biilit Plug-in Hybridbiilit, tassa taakku baterimik, ikummatissamillu ingerlateqarlutik ingerlasut, naluneqanngitsutut, biilit taakku pineqartut, siornaakkunili siunertaasimagaluarpoq, akitsuuteqannginnerat 2019-mili atorunnaarsinneqassasoq, kisiannili tamanna pinngitsoortinneqarpoq, ilaatigut uagut Inuit Ataqtigiit atorunnaarsinneqanngikkallarnissaannik oqariartoqataasimanerput ilaatigut pissutigalugu.

Allannguutissatut siunnersuuterpassuit qulaani pineqartut, ilaasa akornanni takuneqarsinnaavoq Naleqqakkut siunnersuutigisimasaasat ilaat tassalu, taakku biilit pineqartut 2020-mi aallartittumik akitsuuteqannginnerat ukiut tallimat ingerlaneranni atorunnaarsikkiartuaarneqassasoq; eqqunneqarneranni akitsuut aammalu ukiumut akitsuut eqqarsaatigalugit (motorafgift); 2020-mi 50%-mik akitsuuserneqassasut, 2021-mi 60%-mik, 2022-mi 70, 23-mi 80 24-mi 90. 25-milu 100 %-mik akitsuuteqartinneqalerlutik.

Taassumalu saniatigut siunnersuutaasa aamma ilagaat biilit innaallagiaannarmik, brintiinnarmillu ingerlateqartut aamma ukiumut akitsuutaasup nalinginnaasup nalingata affaanik akitsuuserneqartalerissaat.

Allannguutissatut siunnersuutaasimasut qulaani taakkartorsimasakka marluk Naleqqaminngaaneersut imaaliallaannaq akuersaarsinnaannginnatsigit Inuit Ataqtigiinniit oqariartuutigissavarput.

Inuit Ataqtigiit naleqartitatta pingaartilluinnakkattalu ilagilluinnarpaat, siunissami qaninnerpaami nunatta tamakkerlugu tamakkiisumik - 100 %-mik - minguitsumik ataavartumillu tunngaveqartumik nukissiuteqarnikkut pilersorneqalernissaata piviusunngortinneqarnissaa.

Taamaattumik aamma nuannaarpugut qilanaarpullugu Qasigiannugit eqqaanni erngup nukinganik nukissiutiliorfimmik sanaartortoqarnissaa Naalakkersuisut aaliangiussimammassuk Inuit Ataqtigiit upernaq manna Aqqa Samuelson aqutigalugu siunnersuugisimasarput tunngavigalugu.

Naak nunarput erngup nukinganik nukissiuliorfinnik tallimanik peqaraluarluni aammalu innaallagissap pilersinneqartup 62,3%-iata missaa erngup nukinganinngaanniit pilersinneqarsinnaagaluartoq, taamaattoq innuttaasut 75,3 %-iisa missaat sulii dieselolietortumit kiassarneqartuupput.

Nassuiaatip ilaa tassaavoq nunap atugarisaatut kiassarnerup ilaa annertoq inuit namminneq uuliartortunik, kissarsuutaasigut kiassaateqarfiisigullu pissarsiarineqartarnera.

Taamaattumik erngup nukinganik nukissiorfiliernerup saniatigut aamma pingaaruteqarpoq, ungasianik kiassarneqarnerit, ungasianiillu innaallagissamik pilersorneqarsinnaanerit ineriartortitsuarneqarnissaat.

Nukiup pilersinneqartup tamakkiisumik atorluarneqarnerulernissaa pillugu anguniagaqartuartaqarpuq, suliniuteqartuartaqarpuq. Aporfiusinnaasullu suut tamaasa nungusartariaqarpuq nukimmik atorluaneqarnerulernissarput aqutissiukkumallutigu.

Nukimmik ataavartumik, avatangiisimillu minguitsitinnugsumik atorluaneqarnerneq aamma siunissaq eqqarsaatigalugu aningaasarpassuarnik sipaaruteqarnerulernissamik nassataqartussaavoq; sipaaruteqarnitsigullu taamaalilluta suliniutinut allanut pingaaruteqangaartunut siunissaq eqqarsaatigalugu akissaqarnerulissaagut; atorluaneqarnerneq sipaarutaaginnarani aningaasaqarnikkulli aamma inuiaqatigiinnut iluaqutaalluulerumaarnissaa qularutissaanngilaq.

Minguitsunik ataavartunillu nunatsinni nukissiuteqarner ineriartortittuartigu; Seqernup Qinnqornerani pinngortuuppat, Anorisaataappat, Ernqut Nukinganinngaaneerpat, Ikuallaavimmingaaneersuuppalluunniit tamaasa iluatigalugit ineriartortittuartaqarpuq.

Biilit plug-in hybridit, innaallagissamoortullu allat eqqarsaatigalugit, illoqarfinni anginerusuni orsersorfiusinnaasaannik pilersitsiortorniarta – orsersorfiusinnaasunik inerisaaniarta; Biilit unittarfiini, pisiniarfiit eqqaanni, inissiaateqarfiit unittarfiini innaallagissamut orsersorfiusinnaasunik ikkussuiniarta.

Nukimmik atavartumik avatangiisimillu mingutsitsinngitsunik atuisut pillarnagit, akitsuusersor-nagillu sapinngisarput tamannuat atorlugu tapersersortigit, ineriartoqqullugit oqinnerpaamik atugaqarnissaat aqutissiuutigu.

Naggataatigut; Naleqqap siunnersuutaasa aamma ilagaat ATV-it aammalu UTV-it akitsuuteqarun-naarsinneqarnissaat. Inuit Ataqtigiinniit siunnersuut aamma tamanna akuerinngilarput.

Stine Egedelli siunnersutaa, tassalu ATV-it UTV-llu akitsuutaasa 6.554-miit ukiumut 2000kr-mut appartinneqarnissaanik siunnersuutaa Inuit Ataqtigiinniit akuersaaratsigu oqaatigissavarput.

Stine Egdep tunngavilersuutimi ilaani ima oqariartuuteqarmat isumaqatigaarput;

“ATV-inik piginnittut arlallit ullumikkut ukiami nummerpladetik piiartarpaat, upernaraangallu imaluunniit aasaraangat nummerpladelersoqqittarlugit. Taamaaliortarput ukiup affaanut akileraarut, ullumikkut sillimmasiineq ilanngullugu aningaasartuutaangaatsiartoq amerlasuut akissaqarfigniarlugu ajornartorsiutigisinnaasaat, sipaarumallugu.

Nummerpladet piiarneqartut atoqqinneqarneq ajorput. Sequtserneqartarput iginneqarlutillu. Akileraartarnermut Aqutsisoqarfinni allaffissornikkut systemit nummerpladet atoqqinneqarsinnaanerannut aaqqissugaanngillat.

ATV-inik nalunaarsuiuarnerit atuukkunnaarsitsinerillu pisortanut pisariaqanngitsumik artukkiiginanngillat, tassalu politiit akileraaruserivillu, kisianni aamma pinngortitamut pisariaqanngitsumik artukkiinermik kinguneqarput.

Qamutitut motoorilinnut ukiup affaanut akileraarut 1.000 kronenngorpat, naatsorsuutigineqarpoq ATV-inik pigisallit ukioq kaajallallugu nummerpladetik pigiinnartalissagaat.”

Taamatut oqaaseqarluta immikkoortut taakku pingasut tamaasa, peqqissaartumik sukumiisumillu sammineqarsinnaaqullugit aningaasaqarnermut akileraartarnermullu ataatsimiititaliamut ingerlateqqippagut.